

Verachtend all predig vnd ler
Als ob er nit säh noch hör
Kem einer von den dotten har
So lieffman hundert mylen dar
Das man von jm hort nuwe mer
Was wesens in der hellen wer
Vnd ob vil lut fürend dar in
Ob man ouch schanckt do nuwen win
Vnd des glich ander affen spil
Nun hat man doch der gschriff so vil
Von alter vnd von nuwer ee
Man darff kein zugniß furter me
Noch süchen die kappel vnd flusen
Des sackpiffers von Nickelshusen
Got redt das vs der worheit sin
Wer hie sünd düt / der lidt dort pin
Wer hie sin tag zü wißheit kert
Der wirt in ewikeit geert
Gott hat geschaffen das ist wor
Das säh das oug / vnd hör das or
Sor vmb ist der blindt vnd ertoubt
Der nit hört wißheit vnd jr gloubt
Oder hört gern nuw mâr vnd sag
Ich vörcht / es kumen bald die tag
Das man me nuwer mâr werd inn
Dann vns gefall vnd syg zü synn
Iheremias der schrey vnd lert
Vnd wart von nyeman doch gehört
Des glichen ander wisen me
Des ging harnoch vil plag vnd we

man auf d



*210
mab*

1016